



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :



Tir Yimiyim



tiryimiyim@aolima



tir yimiyim

TAPAK 7

Garbine Muguruza tennis asaya nungi anenogo

Imran Khan kinungtsü nem miim agütsüba mangur: Doctors



VOL. XXI ISSUE NO. 189 (ADOK 189) DIMAPUR TENTONÜ (MONDAY) RONGCHII (APRIL) 22, 2024 ₹ 5.00

Power Department-i 'shutdown' osang metetdaksür

Dimapur, April 21, 2024 (TYO): April 21, 2024 nungi tenzüker May 20, 2024 tashi Kohima Transmission Division kübok 33kV, 66 kV aser 132kV Transmission lines anasa süngdong-lidong merüktetba den anepalutsü ta Power Department-i metetdaksüogo.

Iba atema anogoshia anepdang 8:00 ako nungi nikongdang 3:00 ako tashi total shutdown alitsü ta Executive Engineer, Transmission Division Kohima office-i ashi.

Transmission lines anepaluba maparen ajanga Kohima district kübok Southern Angami, Northern Angami, Zubza aser Lalmati den Phek o Kiphire district

tem kongshitsü ta parnoki ashi. Item tesem nung consumers aser public-i Power department den amaliteptsü aser koda masüba timtem arema atatsü mepishir ta Executive Engineer-isa ashi.

Külen, Executive Engineer Transmission division Mokokchung Hekaito Assumi-ia Mokokchung kübok 132kV aser 66kV Transmission Lines anasa merüktettsü osang metetdaksüogo.

April 25 nungi May 31 tashi Longleng, Mokokchung, Mon, aser Zunheboto district tem nung anepdang 8:00 ako nungi nikongdang 4:00 ako tashi power supply ajunga shibangtsü ta Executive Engineer-i ashi.

INDIA Bloc-i CAA agientsü: P Chidambaram



Thiruvananthapuram, April 21, 2024 (Agencies): INDIA Bloc-i Centre nung sorkar akümba sülen mezüngbuba Parliament session nung ashishitep aketba Citizenship Amendment Act (CAA) agientsü ta Congress lennir tejen P Chidambaram-i ashi.

Congress party indang tebilembaji CAA agientsüba lir saka onok manifesto nung iba onük ya meinok ta Chidambaram-i ashi.

Congress indang manifesto nung CAA agientsü meinokba atema Kerala Chief Minister Pinarayi Vijayan aser CPI(M)-i aija arur.

"Onoki iba ya manifesto nung meinok kechiyong langra kümadok. BJP-i küm 10 yimsü süa arudang Parliament nung nübo teimba tashi tim mesüi

amshio go ta Chidambaram-i ashi. "Ozüngtem tarensen aika lir aser iba nungi ozüng pungu khenyongi agientsü. Ni manifesto committee nung chairman lir aser ojang shiaji ni zülu. Anungji onoki kechi inyaksü ni jangajangja meteta lir. CAA ya yanglushitsü masü saka ajunga meyipa agientsü. Onoki ibaji tejangja metetdaksüogo" ta pai ashi.

Congress-i CAA anema menoktak ta Vijayan-i aitsüba atema "Thiruvananthapuram MP Shashi Tharoor-i Parliament nung CAA anema jembio go" ta Chidambaram-i ashi.

Ayodhya Ram tekülem ki lapokba ajanga elections nung kongshitsü asü ta osangbeneri asüngdangdang "ibaji meimlar" ta paisa langzü.

"Ayodhya nung tekülem ki ka lir. Onoka pelar. Nübertemi tekülem ki ka aginüa liasü aser tang ibaji yangluogo. Ibaji otsü tetembang asütsüla. Ayodhya nung tekülem ki kati kodaser politics mesüra elections nung aser linük madak yimsü asütsüba nung kecha shilem mali" ta Chidambaram-isa metetdaksü.

Inner Manipur polling station 11 nung re-poll asütsü

Imphal, April 21, 2024 (Agencies): Inner Manipur Lok Sabha constituency nung re-poll asütsü atema maparen inyakdar.

Inner Manipur parliamentary constituency kübok polling station 11 nung April 22, 2024 nü re-poll asütsü ta Manipur Chief Electoral Officer Pradeep Jha-i metetdaksüogo.

"Ken o tem benokba ajak angadangogo. Election Commission of India-i polling station 11 nung re-poll asütsü

lemtetogo" ta CEO Jha-i ashi. Election ketdangsürtemi tashishitsü melii aser timi election agitsü atema mapa inyaker, ta paisa ashi.

April 26, 2024 nü Outer Manipur Lok Sabha menden atema tanabuba shilem agitsü lir ta Pradeep Jha-isa ashi.

"Maparen ajunga inyakogo aser assembly segments 13 nung polling asütsü. Election tiptema agitsü atema nüngdakba infrastructure aser security atema mapa inyakdar" ta paisa ashi.

General Secretary & Ato Kilonser Kitovi Zhimomi melena Alezo Venuh shim



N Kitovi Zhimomi (file)



Alezo Venuh (file)

Dimapur, April 21, 2024 (TYO): Naga yimtenren wadang tsütsü tatalokba tasen ka lir aser ibaji National Socialist Council of Nagaland (NSCN) General Secretary N Kitovi Zhimomi mapa nungi anentsüba osang lir. Deobarnü N Kitovi Zhimomi mapa nungi anentsüba osang den pa melena Alezo Venuh shimba metetdaksüogo.

April 21, 2024 nü Tatar Hall, Naga Unification camp, Khehoyi nung extraordinary emergency National Assembly amendang iba lemtet agi ta National Tatar Hoho, GPRN/NSCN Speaker Inaka Tsuqu aser Chief Secretary,

GPRN/NSCN Kideon V. Zhimomi nati sangdong ka nung ashi.

NSCN General Secretary aser GPRN Ato Kilonser N. Kitovi Zhimomi-i National Yehzabo (Constitution) nung Arrla 18 aser Party Discipline Section- A clause- 8 aser Section -C clause- 4 alema inyakogo ta senden nung adeneremi agizük.

Iba jagi National Yehzabo nung ajemdaker senden nung adeneremi Kitovi Zhimomi anentsü aser pa melena NSCN General Secretary aser GPRN Ato Kilonser inyaksü atema Alezo Venuh shimtet, ta sangdong

nung shia lir.

Ato Kilonser Kitovi-i tesüba küm aika sorkar asoshi senotsü tsütsü timtema aru aser iba ya pai asalentong yangluba ka liasü. Maneni, GPRN tashimait akümba ya Ato Kilonser-i tim mesüi ketdangsüba aser temulung magütsüba ajanga liasü ta ta Emergency National Assembly-i Kitovi dak tai tongloktsü.

Maneni GPRN züngsemtemi shisatsü lemsatepaka Ato Kilonser Kitovi-i itemji magizük aser sorkar ketdangsübaren nung temelenshi kecha bener maru. Talisa pa ketdangsüba yimyaji nisung ka dang yimsü asüba tangatetba nung liasü aser iba ya Naga national movement inyakym anema lir ta Emergency National Assembly nungsa lemtet.

Kitovi Zhimomi ya Working Committee of NNPGs (Naga National Political Groups) nung Convenor ama inyaker aser külen Alezo Venuh-i Working Committee/NNPGs nung coordinator ama inyaka arur.

INDIA rally nung Arvind Kejriwal aser Hemant Soren na nem menden yutsü

New Delhi, April 21, 2024 (Agencies): Deobarnü INDIA lennirtem Ranchi nung adenshia sentong ka agidang Delhi chief minister Arvind Kejriwal aser taoba Jharkhand chief minister Hemant Soren na asoshia menden yutsü.

"INDIA bloc ajanga telok tashi aitba sayuba dang masü saka Ram Rajya tangatetba sayur aser ibaji Ramayana nung Lord Ram tangaleni yoka alidang Bharat-i menden nung Ram indang khadai yutsüba inyakym beshiba lir" ta Kejriwal atema okatsür Congress lennir aser senior advocate Abhishek Singhvi-i ashi.

Iba sentong nung Kejriwal aser Hemant Soren na

kinungtsütem aden aser o jembia

Hemant Soren-i tepuokdak nungi züluba shidi ka pa kinungtsü Kalpana-i zünga metetdaksü aser iba nung taoba CM Soren-i democracy tamakok mengudaktsütsü ayongzük.

"ED aser CBI ama central agencies ajanga opposition ola nembangtsütsü meranger saka BJP aser iba ama tashi ajak Jharkhand nungi meindoktsü" ta Kalpana-i azüng.

"Parnoki kü kinungbo Arvind Kejriwal tepsetnür. Pa chiyungtsü camera observation kübok lir aser pa nem insulin magütsür. Küboba ya sugar agi shiranger ka lir aser tesüba küm 12 tashi insulin agia arur. Pai anogo nung insulin unit 50 nüngdaker" ta Sunita Kejriwal-

ia ashi.

Ulgulan rally nung Rahul Gandhi adentsüba liasü saka pa ajungbena temang nung timtem ka ajuruba ajanga medentet.

"Rahul Gandhi-i INDIA rally alidak Satna aser Ranchi nung adentsüba liasü, saka pa ajungbena temang mejungi aküm aser New Delhi toktsür mouteter. Congress President Mallikarjun Kharge-i Satna nung public sentong nung o jembiba sülen Ranchi rally nung adentsü" ta Jairam Ramesh-i metetdaksü.

Kejriwal apuba anema Ramlila Maidan, New Delhi nung INDIA bloc rally ka ayonga agiba sülen hopta asem lir Ulgulan rally agiogo.

Nagaland CM aser Dy. CM nati NPF candidate atema nüboyimtsü

Imphal, April 21, 2024 (Agencies): Nationalist Democratic Progressive Party (NDPP) lennirtem Nagaland Chief Minister Neiphiu Rio aser Deputy Chief Minister Taditui Rangkau Zeliang nati Manipur nung Naga People's Front candidate atema nüboyimtsüogo.

NDPP ya BJP aser NPF den yariteper aser Rio o Zeliang nati Senapati district kübok Maram Bazaar nung Honibarnü election nüboyimba sentong ka nung shilem agia liasü. Tenati NPF candidate Kachui

Timothy Zimik pusema iba sentong nung shilem agi. Zimik ya scheduled tribes atema lezmüksüba Outer Manipur Parliamentary nungi tokteper aser April 26 nü polling asütsü sentong lir.

"Manipur aser Nagaland nung alilir Naga nung sobaliba wazüka ayutsüla. Naga nung tarutsü putu ajangzüktsü asoshi NPF candidate nem vote enoktsütsü ayongzük" ta Nagaland chief minister-i ashi.

Senapati district nung assembly segments asem- Mao, Karong aser Tadubi lir.

Senapati district kübok voters 142,688 aser polling stations 220 lir.

Outer Manipur Parliamentary Constituency kübok assembly segments 13- Jiribam AC, Tegnoupal AC, Phungyar AC, Ukhrul AC, Chingai AC, Karong AC, Mao AC, Tadubi AC, Tamei AC, Tamenglong AC, Nungba AC, Tipaimukh AC aser Thanlon AC lir.

Iba constituency nung NPF candidate Zimik den INC candidate Alfred Kangam Arthur aser Independent candidate ana- Alyson Abonmai aser S Kho John na lir.

Manipur nung NPF candidate atema Nagaland CM & Dy CM nungeri nübu yimtsür



Manipur nung NPF candidate atema Nagaland CM & Dy CM nungeri nübu yimtsüba mapang tangokba noksa angur.

Imphal, Rongchii/April 21 (Agencies): Nationalist Democratic Progressive Party (NDPP) lenir aser Nagaland Chief Minister Neiphiu Rio aser Deputy Chief Minister Tadtui Rangkau Zeliang nungeri Honibarnü Manipur nung Lok Sabha election nübuyim nung shilem agia liasü.

NDPP ya Nagaland nung BJP aser Naga People's Front indang coalition partner lir.

NDPP lenir ana yagi Manipur nung Senapati district kübok Maram Bazaar nung nübuyimba sentong nung jembia liasü.

Parnoki NPF candidate Kachui Timothy Zimik bhukuma liasü, shiba scheduled tribes asoshi wazüka aliba Outer

Manipur Parliamentary menden asoshi tokteper. Iba menden asoshi election ya April 26, 2024 nü agitsü lir.

Iba nübuyim sentong nung jembidang Nagaland chief minister-i Manipur aser Nagaland nung aliba Naga nungeri Naga nung sobaliba wazüka ayutsü tongtipang lir ta ashi.

Mapang talangka nungi Naga nungeri tarutsü putu ajangzüksü asoshi jangra aliba asangsang kumdaktsüsü mechi Manipur nung alirtemi NPF candidate nem vote agütsüsü, ta pai ashi.

Senapati district nungya assembly segments asem lir - Mao, Karong aser Tadubi, aser April 26 nü vote agütsüsü.

Iba district nungya polling

stations 220 aser voters 142,688 lir, aser assembly constituency 13 ayimjemer, aser Manipur nung district ti rongnung voters timba aliba district akumer.

Assembly segments 13 nungya JiribamAC, Tengnoupal AC, Phungyar AC, Ukhrul AC, Chingai AC, Karong AC, Mao AC, Tadubi AC, Tamei AC, Tamenglong AC, Nungba AC, TipaimukhAC, aser ThanlonAC lir aser item tesemtem ya Outer Manipur PC küboki aiter.

Outer Manipur Lok Sabha menden atema NPF candidate Kachui Timothy Zimik den Indian National Congress nungi Alfred Kanngam Arthur aser Independent candidates Alyson Abonmai aser S Kho John nungertem tokteper.

NST, Churches & Middle Point colony, Dimapur nung nüburtem saksalemtsü ayongzük

Dimapur, Rongchii/April 21 (TYO): Kija aser lokti tentet balala arua senotsü teyari meshiba atema ali kibur aser business establishments balala nungi ashishiba sülen Dimapur yimti kübok NST Colony, Churches Colony, aser Middle Point indang Joint Council Forum senden ka April 17, 2024 nü mena onoki memeteti mesüra temelaba magie unions aser associations tetsüng ajemokba khenyongi magizüksü ta pangjema liasü.

Item lokti tentet ya nungja balala jateter tejangja tashi aser ketdangsur meliaka onok aliba tesem nung business community dang ozüng alema donations meshir, ita shia senotsü sarur aser züngsem saru meshir.

Saru balala meshiba ya Naga Political Groups (NPGs) temi meshiba ya kisüng masü, saka nukjidong aser kuli balala bener lokti tentet balalai donations/sarusaji zünger mezüngmai meshiba ya dena lir, ta JCF ajanga ashi.

Shishilembartem aser nüburtemi joko mokokteter, anungji district ketdangsur temi Colony Council tem den shisa agitepa kanga junga meita atatsü aser item unions aser associations nem temelaba magütsüsü ayongzük, ta ashi.

Dimapur district kübok tesem ajak nung amai taila lokti tentet balala jateta shishilembar aser nüburtem nem khuret bener arutsür aser mangmandaktsür.

CSOs temia iba amala unions/associations ya

recognize asütsü atema ketdangsur dang majungshitsüla mesüra memepishitsüla, ta Joint Council Forum ajanga ashi.

Iba tebilemstü ya onsara kumogo, anungji ozü jurisdiction nungi tangsa iba amala inyakyim anentsüla, aji mesüra timtem alitsü. Onoki akhangba ama meinyakra, Joint Council ajanga nunnganga melie mera agitsü, ozüng agi mela aliba ama tashi amshia item ashikülak inyakyim shibangtsüsü, ta ashi.

Item telok yagi shishilembar aser nüburtem nem menügdakba nung timtem khuret agüja osettsüset nung jenjang timba kumdaktsür. Tenokdangba makai item nisungtem aser lokti tentet aitba ajanga onok alidak ozüng alema senotsü sarusaji tenzük aser nüburtem süngjema meliteter, ta JCF sangdong ajanga ashi.

Shishilembar aser nübur temi iba amala lokti tentet den kanga kumdanga aser saksalema jembishinütsü aser temulung melemtetba mapa inyakba putetra tasü ita Joint Council nem osang agütsüsü ayongzük, ta ashi.

Ozüng agi memelaba iba amala yimyatem samadakja asen nüburtem wazüka ayuba nung asenok ajak lungjemer inyaktsü ayongzük.

Taoba mapang iba amala unions/associations tem nem Council/council members kari agütsür aliba No Objection Certificate magitsü metetdaktsür, ta JCF sangdong ajangasa ashi.

Meghalaya: Yimjung ken o atema HNLC-i ola madoker

Shillong, Rongchii/April 21 (Agencies): Meghalaya sorkar aser nokdanga aliba Hynniewtrep National Liberation Council (HNLC) tsüngta yimjung ken o jembitsü teimla tejangja ka monguteter, kechiaser tawa sorkari ayongzükba nung iba telok yagi telangzüba agüja mali.

Taoba senden nug HNLC indang lenir temi shilem magitetba sülen Meghalaya sorkari maneni iba telok den

jembishinü kaner. Sorkari yimjung asoshi bendanga agütsür inyaker aser HNLC ajanga par temulungtetba tanaben shisadanga yimjung ken o jembiba langpangi arutsüla, ta Deputy Chief Minister Prestone Tynsong-i nenshia ashi.

Ajisüaka HNLC indang interlocutor Sadon K. Blah dangi iba telok yagi yimjung ken o jembishinütsü atema osang kecha yoka mali ta ashir. HNLC nungi telangzüba kecha

manguba ajanga parnoki jembishinü akatsü memulunger asü ta bilemer.

Jembishinütsü atema sorkar renema lir aser teti mulunga lir, saka HNLC-i jembishinü masütsü mulungtetra linük nung amshiba ozüng-i tatem nung takok angutsü, ta Tynsong-i ashi.

Anungji yimjung ken o jembiba nung takok mongutetra sorkari mera tesashi kar agitsü atema renema lir ama iba sangdong nung angateter.

Choklangan yimdak AR-i sewing machines agütsü

Dimapur, Rongchii/April 21 (TYO): Assam Rifles temi Civic Action Programme kübok Indo-Myanmar arütsü anasa Choklangan village, Noklak

district nung tetsür Self Help Groups nem sewing machines lema agüja liasü.

Tetsürtem pei sasa aayanga pei poksünga alitsü asoshi ajungmesoa aser

teyari agütsür ama iba sentong ya April 21, 2024 nü ayongzükba liasü.

Iba ama mapa tajung inyakba yimdaklir temi pelashishia agizükba liasü.

Assam nung HSLC tatidang majangtetba yong kaketshir ka asü

Guwahati, Rongchii/April 21 (Agencies): High School Leaving Certificate (HSLC) examination nung takok monguteter mechi Assam nung Baksa district kübok Moirajhar nungi arishi küm 16 tain kaketshir tetsür ka Honibarnü asü.

La ya pesticides ajem südi ta osang ajanga ashir.

SEBA ajanga HSLC tatidang indang results ya Honibarnü sangdong aser iba

tetsürta yagi tatidang nung takok mongutet.

La ya mozü kidangi arrsanga anir oaka la iba miim yagi asü. Iba osang angazüka nüburtem kanga temulung shirangteper.

Iba tatalokba yagi tatidang mapang kaketshirtem shisabulo khuret balala aliba sayur.

Tatidang junga agütsüsü imlaba ajanga kaketshir tekolokshisatsü aser temulungjang nung kanga kongshir.



(Abelen) Dimapur, April 21, 2024 : Deobarnü Council Chairman lia Wb. Lanuchuba Imchen-i timtem ajurur alir nem teyari sen amoktsüba noksa nung angur. Dimapur yimti kübok Imkonglenden Colony nung Honibar aonung yipru ajanga ki asem kanga mejungi raksatsüogo aser timtem ajurua alir kibongtem nem Imkonglenden Colony Council-ia senotsü teyari agüja liasü. Timtem ajurur alir nem tenla tulu agütsüba atema Wb. Lanuchuba Imchen aser par kibong dang pelar ta Imkonglenden Colony Council-i metetdaktsü. (Achiji) Tawa tanü zünglu tanen maka aruba ajanga Mokokchung Deputy Commissioner office anasa anentsüh tuluka aluba noksa nung angur. Iba dak sentakba nung yakta mapa kar meinyakra ano anentsüh tuluba alutsü wadang jagi sayur. Mokokchung, 21st April, 2024



(Abelen) Dimapur, April 21, 2024 : Deobarnü Council Chairman lia Wb. Lanuchuba Imchen-i timtem ajurur alir nem teyari sen amoktsüba noksa nung angur. Dimapur yimti kübok Imkonglenden Colony nung Honibar aonung yipru ajanga ki asem kanga mejungi raksatsüogo aser timtem ajurua alir kibongtem nem Imkonglenden Colony Council-ia senotsü teyari agüja liasü. Timtem ajurur alir nem tenla tulu agütsüba atema Wb. Lanuchuba Imchen aser par kibong dang pelar ta Imkonglenden Colony Council-i metetdaktsü. (Achiji) Tawa tanü zünglu tanen maka aruba ajanga Mokokchung Deputy Commissioner office anasa anentsüh tuluka aluba noksa nung angur. Iba dak sentakba nung yakta mapa kar meinyakra ano anentsüh tuluba alutsü wadang jagi sayur. Mokokchung, 21st April, 2024



Tihar Jail nung ketdangsertemi Delhi Chief Minister Arvind Kejriwal nem 'insulin' magütsür, ta tai tonglokja April 21, 2024 nü New Delhi nung Tihar jail kima Delhi Minister Atishi den AAP züngsemtemi 'insulin' amer longkak aitdang tangokba noksa nung angur.

Lanurtem atema election nung tongti onükji mapa lir: Kharage

New Delhi, April 21 (Agencies): Amongnü Congress party Tir, Mallikarjun Kharage-i, lanurtem atema election nung tongtibangtiba onükji mapa lir aser Congress-i takok ngua sorkar kümra mapa adokdaksüba asüingsashitsü, ta metetdaksü.

Amongnü Kharage-i Hindi oshi agi X ajanga, "Ato kilonser Narendra Modi-i lokti senden noklangka dak tema nung jembidang tesüiba küm 10 tsüngda par sorkari sorkar mapa kwi agütsüar pai memetetdaksü. Tesüiba küm 10 tsüngda mapa crore 20 agütsütsüla saka crore 12 dak tema rakzüik," ta metetdaksü.

Congress-i "Yuva Nyay" kübok mapa asüingsashidaksütsü, ibaji ajanga mapa nung shimoktsü atema tatidang agiba temelaba aküimtsü, ta Kharage-i ashi.

Kharage-isa sorkar mapa lakh 30 tazüing aliba atema nisung shimoktsü, ta metetdaksü. "Yuva Roshni kübok Congress-i start-ups atema Fund of Funds scheme yanglushitsü aser fund nungi shilem 50 lemkütsütsü, koba ajanga arrshi küm 40 nungi tekübokpur lanurtemi pei nija business tenzüktetsü aser mapa maongka-a adokdaksütetsü," ta pai metetdaksü.

Congress-isa Agnipath military recruitment scheme-a anentsütsü, ta pai ashi.

"Mapa manguba tebilemstü tulu lir, anungji Congress-i kaketshirtem education laon sentsüh den sen tetemlok March 15, 2024 tashi atoktsü aser sorkari bank tem nem sentsühji agütsütsü," ta pai ashi.

Congress-i arrshi küm 21 nungi tekübokpur sempet alir saisapongertem nem ita shia

sports scholarship sen 10,000 agütsütsü, ta pai metetdaksü. Tan ita tetenzüklen Congress-i Lok Sabha election atema manifesto sayaogo. Party-i tetsürtem nem senotsü agütsütsü, mapa maongka agütsütsü aser caste census nung rangloker manifesto ji renem.

Congress manifesto nungsa linük tesem ajaklen caste census agitsü nangzüka lir. Scheduled Castes, Scheduled Tribes aser Other Backward Classes nem reservation shilem 50 tashi agütsütsü atema temzüng yanglushitsü, ta manifesto nung shia lir.

Congress-i linük tesem ajaklen Mahalakshmi scheme tenzütsü aser iba scheme kübok linük nung sensaker kibong shia nem küm shia teyari sen lakh kaka agütsütsü, ta nangzüik.

West Bengal nung shingaia CAA menokdangtetsü: Rajnath Singh

New Delhi, April 21 (Agencies): Amongnü BJP lenir aser Defence Minister Rajnath Singh-i, BJP-i nangzüikba ama inyaker aser shingaia West Bengal nung Citizenship (Amendment) Act 2019 mapatong menokdangtetsü, ta metetdaksü.

CAA ya nisung kar dang nungi senso agienadoktsü atema masü saka yimsü nung ajemdaker Pakistan, Bangladesh aser Afghanistan nungi India-i arua ajenoka alirtem nem senso agütsütsü atema lir, ta Union Minister-isa metetdaksü.

Malda Uttar constituency nung BJP candidate, Khagen Murmu atema nüboyimtsüba sentong nung jembidang Singh-i, "Congress, Trinamool Congress mesüra Left party temi election mapang nung nangzüikbatem mataloktsür, ajisüaka BJP-ibo nangzüikba ama inyaker," ta ashi.

"Mamata didi (West Bengal Chief Minister)-i lar state nungbo lai CAA memelatsü ta ashir. Kechiba lai West Bengal nung alirtem ashioktsütsü meranger?," ta pai asüngdang.

Taküm March ita nung Centre sorkari CAA mapa kuma benokogo aser iba ozüing kübok Pakistan, Bangladesh aser Afghanistan nung yimsü nung ajemdaker reshikangshi ajangshiba ajanga December 31, 2014 tashi nung India-i arua jenoka alir Muslim nunger masüba nisungtem nem India senso agütsütsü.

Singh-isa, tamalen aliba sorkartem ama masü saka tang Narendra Modi-i aniba sorkar kübokbo tangartemi India akhümtsübur, ta ashi.

"Alima sabang nung asenoki kodang langka shidir ibaji tangartemi akhümtsübua angar," ta paisa metetdaksü.

Singh-i, Jammu & Kashmir nung Arrla 370 agentsü aser Ayodhya nung Ram tekülem ki sütsütsü ta nangzüikba ataloktsüogo, ta metetdaksü.

Trinamool Congress aija pai, West Bengal nung TMC sorkar aruba sülen state nung rakzükraktemertem, ozüing alema inyakertem aser ochimashirtem dang azükarua alir, ta ashi.

Paisa, Bengal nung TMC sorkari nüburtem nem Central scheme balala kübok tajangzüik magütsür, ta aitsü.



April 21, 2024 nü Ranchi nung opposition Indian National Developmental Inclusive Alliance (INDIA) teloktepi ayongzüikba lokti senden ka nung CPI-ML lenir Dipankar Bhattacharya, RJD lenir Tejashwi Yadav, Shiv Sena (UBT) lenir Priyanka Chaturvedi, taoba mapang Jharkhand CM Hemant Soren kinüngtsü Kalpana Soren aser Delhi CM Arvind Kejriwal kinüngtsü, Sunita Kejriwal nunger adenba noksa nung angur.

Punjab nung kinüngbui jakrep bena aliba mashisa kinüngtsü tepset

New Delhi, April 21 (Agencies): Punjab nung tebur kati pa kinüngtsü (ita trok mashisa) yipten nung lisü agi alenba sülen mi agi rongseta südaksü.

Police-i ashiba agi, apuani naji mangatettep adokba sülen kinüngbui la dak mi senoktsü.

Arrshi küm 23 tetsürlaji ita trok mashisa liasü aser no menden nung jakrep bena liasü. Iba tatalokba ya Amritsar yimti anasa aliba Bullenangal yimdak atalok.

Sukhdev aser pa kinüngtsü Pinky na Hokolbarnü mangatettep adoka raraba sülen

pai kinüngtsüji yipten nung lisü agi alena ayuba sülen la dak mi senokja liasü. Iba tesem nungjisa la mi agi rongseta asü.

Police-i, "Sukhdev aser Pinky na tesendaktep mejungi liasü aser mapang shia tena onük balala nung raratepa dang liasü ta onoki bushitetogo. Hokolbarnüa tena raraba sülen Sukhdev-i Pinky tepseter jena oadok," ta ashi.

Ajisüaka Honibar aonung police-i Sukhdev puogo aser ken o ka benokba sülen bushisüngdang tenzükogo, ta police ketdangsertemi metetdaksü.

Iba osang angashia National Commission for Women (NCW)-i Punjab Police dang iba tatalokba osang tejangja parnok nem agüjang, ta tuyuogo.

National Commission for Women (NCW)-i X ajanga, "Amritsar nung tebur kati pa kinüngtsü mashisa ka dak mi senoktsüba osangji taoksatsüka lir. Iba ama mapa yabo imdangia arutsü makok. Chairperson NCW @sharmarekha-i shidi ka ajanga DGP Punjab dang aibelenerji apuba sülen anogo asemnü tsüngda osang agüjang ta tuyuogo," ta metetdaksü.

Congress menen atema parnok nem temerenshi agütsür: PM Modi

Jaipur, April 21 (Agencies): Amongnü Ato kilonser Narendra Modi-i, Congress-i menaba temenentem atema linük nüburtemi parnok nem temerenshi agütsür, ta aitsü.

Congress maneni aija Modi-i, mapang ka nungbo menden 400 dak tema nung takok angurtemi taküm Lok Sabha election nungbo menden 300 nunga metoktepteter, ta ashi.

Rajasthan kübok Jalore district nung Lok Sabha election nüboyim sentong ka nung jembidang Ato kilonseri, "Election mezüngbuba shilem nung Rajasthan nung tesadang kati Congress nem temerenshi agütsüogo. Linük meimertem aliba Rajasthan-i, Congress-i kodanga India tashi itdaksütsü makok ta meteta lir," ta ashi. "Congress-i kinünger jak

repranga inyakba aser ochimashi inyakba mesen ajanga linük tazüngla kümdaksü. Tanübo linük nüburtemi Congress dang jashir aser parnoki menaba item temenentem atema parnok nem temerenshi agütsür," ta pai ashi.

Jalore district kübok Bhinmal nung BJP candidate, Lumbaram Chaudhary atema nüboyimtsüba sentong nung jembidang pai, "Tang Congress party tensaji parnok aibelen ajanga lir. Mapang ka nung menden 400 dak tema angurtemi tangbo menden 300 nunga metoktepteter," ta ashi.

Rajasthan nung Lok Sabha menden 25 lir. April 19 nü election mezüngbuba shilem nung menden 12 atema election agiogo aser tanüngba menden 13 atema April 26 nü election agitsü.



April 21, 2024 nü New Delhi nung Uttarakhand Chief Minister Pushkar Singh Dhami aser Delhi BJP Tir, Virendra Sachdeva na den Delhi nung Lok Sabha election atema BJP candidate tem- Bansuri Swaraj, Kamaljeet Sehrawat, Praveen Khandelwal, Manoj Tiwari, Ramvir Singh Bidhuri aser Yogender Chandolia nunger tangokba noksa nung angur.



TIR YIMYIM YIMOBILEM (EDITORIAL)

DIMAPUR TENTONÜ, APRIL (RONGCHII) 22, 2024

Tamajung tentep malang !

Asenokbo election nung ya shinga dena tamajung tentep malang ser nung alia oa asenok rongnung tamajung tenteper amai bilemer, kechiyong election nung adokyonga madokyonga party ka nungbosa takoksa aser timtem aremabo melitetsü ta bilemer election nung shilem agirtemji asenok lir. Aji oda, election nung tokteper tema election-i aidangbo party ka nung aitsü aser tatemibo ano tangar party ka nung atemtsü ta asüba purtemji asenok lir. Kasaji, asenok nübortema asenoki asenoksasa kechi party purtemar mejangjatet ka taküm piyong nung vote agüja election nung shilem agir. Atangji, Nagaland state tenzüker election agia arudang tentetba teloktem NNO aser UDF nung adener aser yarir tsüraburtem karbo tanü tashi NNO asüba agi tanü tashi Congress nung vote enoktsürtema lir aser UDF yariba agi tanü tashi party tenüngji masü saka an tepong nung vote ajentsürtema lir. Aiben asen lima election agiba yimya agi parnokji pei vote peisasa ajentsüsa mapang aser maongka mangu süitema alitsüa akok, ajisüaka pei vote peisasa agütsütetsüsa mapang arunungbo parnok jagibo meji mejir arua akhidang enokja aruba telok aser noksa nemji pei vote ajentsütsü. Idakji jangratemtsü aser mulung pela ka lir. Ajisüaka, tanü asenok yabo koba teloki ta masü saka shibai sen teimba agütsüdir aser shibai government mapai mashilen nungi asüyonga aniochtsütetdir aser junga meinyaktetsü asüyonga shibai contract mapa tilaka danga agütsüdir ta asüba tangatetba aser nükjidong nung dang asen vote enoktsür. Iba tangatetba nungjibo pei vote dang masü saka yimer ajak den tamajung tentepa pi meyong proxy vote dena ajentsütsü. Aji oda, asenok asoshi political party nükjidongtemji tongtibangba masü saka ni 'ruling' government nung adener asü masü (?) ta asübajiang tongtibang lir. Ibayongji, election nung yamato o tamajung shitepa aser majung inyaktepa tamajung agitepyonga election temerbo ajak government nung ka dang kumadoktsü aser nübortema taruba election matong tashi kasa akhi aluisa oa atatsü. Alima yimten yimli nung yimsüsürtem shimtsü asoshi nübortem nem maongka agütsüba democratic inyakyim nung yimten telok balala tenteter election nung toktepdaktsütsü aser shirnoki kokdir parnok nemji mapang tatazük ka atema yimsü südaktsütsü ta asüba nükjidongji yimten telok shia nükjidong meteter külenang nübortem nem telemtetba agidaktsütsü asoshi lir. Ajisüaka, tang ya Nagaland nung nisung mashi ka dang NDPP, NPF, Congress aser BJP nükjidong aser parnoki inyaktü bilemba sentongtem indang asüngdang nung meshitettsü. Iba jagi asenoki yimten indang süoki ia mebilemi yimten nung shilem agiba sayur. Ashi, asenoki yimten indang süoki ia bilema, tatishitsü agi, NDPP aser NPF telok ama Regional teloktemi Naga yimten nüchiso indang tali bilema India government den telemtetba agitsü tenangzükba nung election nung toktepra aser ibaji shitaka ta bilema nübortemi yaria adokdaktsüra, election temer government tenzüka aodang nungi nübortemi rongshia anidaktsü aser tanaben election arudang aji inyaktet asü meinyaktet ta asüba onük tuluba ser jembitsü. Kasaji, tatishitsü agi, BJP telok nükjidongji India nung kin aser tamangba yimsü ajak asoshi sobaliba temzüng ozüng ka dang asütsü ta telemtetba yar election nung toktepra, asenok asoshi BJP candidate-i sen kwi agütsür ta asübaji masü saka asenokia parnok nükjidongji agizükteter asü magizüktetter ta asüba nung telemtetba agitsübajiang tongtibang lir. Kasaji Congress teloki center nung government akümer makümer ta asübaji masü saka Congress telok nükjidong meteter külenang Congress yaritsü meyaritsü lemtetbajiang senso ka asoshi alima atema tagitsü asütsü. Tang tangbo, asenok election agiba yabo election agir masü saka vote ayoker o talir na ajurutepa tiyazüka raratepa sayur amai lir. Asenok ya asangsang yimten nung alir masü saka taila yimten ka yanglutsü aser melentsü asoshi tamajung tenteper, rongsen lalur aser mapang endokertem amai dang lir. Yamai mesüi asenoka tamajung aser nüngsen agi langa yimten telok nükjidong angateta yimten yimli tajung ka asoshi takoksa aser timtema arema shilem agitsü tangatetba ka dangi aru meshiogo.

OLEMSABANG

Nübur Temang Anema Alitsü Tesayuba: Anü Tatsük nungi kümzüka alitsüyim

(Public Health Advisory: Extreme Heat/ Heatwave

TEINYAKTSÜTEM (Do's)

Nübur Rangpen Asoshi (For general population)

~ Chief Medical Officer, Mokokchung, Nagaland

Temang nung tzü peria alitsüyim (Stay Hydrated)

- * Na metzüra yonga akok tashi tzü peria ajemtsüla.
- * Oli ora dang tzü teti bener senzütsüla.
- * Oral Rehydration Solution (ORS) aser pei sasa yangluba tasentsü tzü, mamatsü, lassi, süngjanglijang tzü amala nung metsü tera inoker ajemtsüla
- * Mongpu balala nung anguba süngjanglijang aser aonsotsü koba nung tzü peria lir, item chiyungtsütem achitsüla. Naring, chiru, züngi, water melon, grapes, lettuce mesüra yamala süngjanglijang aser aonsotsütem nung tzü peria lir.

Temang süpoktsüyim (Stay Covered)

- * Cotton süoshi tapu aser sentsü tesangwa asemtsüla
- * Kima yimdong nung senzüdang tokolak meyibangtsü asoshi korang, sü mesüra anüshi aponger senzütsüla.
- * Yimdongi aodang shoes mesüra chappal asemtsüla.

(Maneni asüng adok nung...)

KHRISTANPUR ANÜNGER

I. Temjen Jamir Retd. Addl. Sp Mkg

(Yashi adok nungi...)

5. Tangatetter aser temeteteri tejenba yimlij toktsütsü, kechiyong tajemrep nung masü saka temetetba nungi anir.

Temelenshi o ya karibo tamajung ama bilemer. Asüktemba ya English oshi nungbo 'Anarchy, Terrorism coup detat' tem nungi balala lir. Item yabo tamajung lir. Azü tokshi ajanga dang temelenshi bener arur masü.

Tatembang nung ya bilemdangdi

New Guinean nungeri Australia nunger lenir ka dang ya ashi, "Mapangshia onok nem kika süchi (fest of merit) agütsüba agi nenok teka shidoka sayur. Onok shisatsü makaba telok ka masü, saka nenok Australia nungertem rakzükrademer ka ama onok New Guinean nungertem masü". Iba o angashia Australia nunger lokti yimden meimeri pei tai nangzük. America nungeri South Vietnam nung küm aiak rarar külen Jimmy Carteri ashi, South Vietnam ama joko mataloktsü asenoki aibelen tulu inyakogo.

Asen Naga nunger tai ta pei sasa shitetsü tim, pei mapa meteter yanglushibaji nisung ka jakla sayur aser uludaktsür. David chubai pei majung indang kukua bilem aser nangzük, T.ken 51. Naga nunger nüjiso bushir rogoi lenti nung gari merepdanga anener traffic jump adokdaktsür, saka tzü mari ashir kin ka nüjiso ngunera tamasa yimya tajung ajaki meimtsüsa ne dak alitsüla. Telongpur o tema pur na yaritepa amalitepa lenmang bushia public mungdang ajanga lemtet ajak India nunger dang shira asenoki bilemba ajak ataloktsü. (Nagas at the end of twenties century 1959 - Eliwn) nung ashir, Ao kin aser Naga nunger ochishiba telok tashi tuluka lir, akümtsübuba (Tsüngrem) aser meranga inyakab kin ka ta angashir". Ajak liaka asen Naga nunger Tsüngrem chirtem lir.

Na asoshi ner limai kechi inyaktetsü ta tasüngdang, saka nai ner lima asoshi kechi inyakatetsü ta asüngdangang" John F Kennedy 1961. Tang India government-i (CAA) senso melenshiba ozüng, India ajunga oshi ka dang jembitsü, achi ajemtsü Brahman ama azü aliba chiyongtsü machitsü, sobusülemtsü kasa, India temzüng ajak melenshiitsü ano aika ni mashir.


Asenok jakdang tongpang tulu lir, tenyar Paul-i ashiba ama asenoki Tsüngrem raraba sobutsü sobudi. Efesa 6:11, iba putu yimya ama malitsü, saka Tsüngrem nem taküm rangben tenla agütsüdi Rom12.

Iran nunger lanurtemi May 1984 nung temelenshi bener aruogo, asen lanuri pei lima asoshi bendanga agütsüdi aser tajemreptsü alibaji Yisu dang tongdangjang ta shidi aser tarutsü Lucifer ain adok nungi kümzüka lidi ta ayongzük.

Tasü mait teli Naga lima aser India ajunga nung pei amangnüba sademsadema amangtsü shibaisa Yisu Khrista tenüng nung asen lima asoshi nokdaktsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

35buba US Capitol Bible Reading Marathon tenzükogo



Tamalen Covid wara metenzükang 2019 kum US Capitol nung Bible Reading Marathon nung nisung kati shilem agidang tangokba noksa nung angur.

Washington, D.C., April 21 (Agencies): Honibar (April 20) nikonngang 35bubal U.S. Capitol Bible Reading Marathon tenzükogo aser iba sentong ya Bodhbar anepdang tembangtsü.

Bible Reading Marathon nung shilem agirtemi Laishiba nung Lipok kakat nungi tenzuka Jungkai Adok tatembangbuba tashi azüngtsü.

Indiana nung amenoka aliba ministry Seedline International-i ayongzükba marathon nung shilem agir shiai minute 15 Lai azüngtsü aser Laishiba mezüngbuba tapak nungi tenzuka tatembangbuba tapak tashi azüngtsü.

Bible Marathon ya Honibar nikonngang 2:00 ako nung tenzük aser Bodhbar anepdang 10:00 ako tashi nungbo tembangtsü imlar.

Iba marathon nung shilem agitsüpurtemi tenüng jelia agüja liasü ajisüaka jungdak Lai züngnertem nem-a maongka agütsütsü, ta Seedline International-i metetdaksü.

Tanaben asoba Khristantemi iba marathon nung shilem agir aser shilem agitsüpurtemi parnok nem lezmükja aliba mapang matongdang minute 5 jelia sentong agiba tesemji tonger alitsüla. Iba sentong reprangtsü atema sentong agiba tesem tonga moutetertemi Seedline International indang YouTube channel nung reprangtsü akok.

Interview ka nung jembidang Seedline International tentetsang aser Director, Keith Davidson-i, "Asen linük Capitol nung Lai azüngbaji akümüli nung maongka balaka asütsü. Onoki teti agia anüolen tsütsü shir Lai azünger, aser ibaji ajanga linük tesem ajak ayimjemer ta züngshir. America tenteter tsüraburtem taginüba aser linük longjema alibatem ataloktsütsüji tongtibang; itemji Tsüngrem O nung ajemdakba tangatetbatem lir," ta metetdaksü.

Davidson-i, marathon ayongzükba agiba nükjidongji America nung tanaben Laishiba dangi meyipdaksütsü, asen linük tamendakdak koda tongtibang ibaji metetdaksütsü

aser kibong ka ama longjema alitsü atema lir, ta metetdaksü.

Paisa, Bible Reading Marathon ya alima nung züluba kakattem rongnung tongtibangtiba kakat dangi asenok meyipdaksütsü atema lir, ta ashi.

Davidson-isa, tang tashi nungbo U.S. Congress nungi züngsemtemi marathon nung shilem agitsü asü magitsüar mejangja; taoba mapangtem nungbo parnok shilem agia aruogo, ta ashi.

Paisa, Khristan lenirtemia iba sentong nung shilem agitsü aser parnok rongnung Washington D.C nung aliba People's Church nungi Michael Hall, Hope to the Hill ministry nungi George Roller, Advance USA ministry nungi Carl Herbster aser Faith & Liberty melungtet telok nungi Peggy Nienaber nung densema lir, ta metetdaksü.

Marathon sentong reprangtsü atema khen nung Arogotem densema nisung 30 nungi 50 tashi arutsü imlar, ta pai metetdaksü.

"Marathon sentong agiba mapang nisung aikati khen angaba sülenbo oadoker, mapang ka nung dangbo lokti tulu madenshir," ta pai ashi.

Coronavirus wara aliba mapang nung kum ishikabo U.S. Capitol grounds nung marathon sentong ya magiteti liasü saka 2023 kum nungi asentenshir iba sentong ayongzükba agir. Taküm iba sentong agitsü atema temelaba kanga saaka dang angu, ta Seedline International-i metetdaksü.

Coronavirus wara aliba agi iba sentong ya kum ana tashi magiteti aruba sülen yaküm nungi asentenshir Capitol Bible Reading Marathon tenzuka liasü.

Kum shia National Capitol Bible Reading Marathon nung shilem agitsü janrartemi online ajanga tenüng agütsü. Lai azüngba marathon nung shilem agitsüpurtemi Khrista nung tanaben asortem asütsüla.

Tesüiba mapangtem nung iba sentong nung Congress züngsemtem, Khristan school tem nungi kaketshirtem aser

Arogotem nungi züngsem aikati shilem agia aruogo.

Davidson leniba nung iba sentong agir, ajisüaka iba sentong takok angutsü atema volunteers team kati yariteper.

National Capitol Bible Reading Marathon dak alia Davidson-isa linük tesem ajaklen state capitols nunga Bible Reading Marathons ayongzükba nunga yariteper.

Yaküm Tennessee, Indiana, Pennsylvania, West Virginia, Louisiana, North Carolina aser South Carolina nunga iba sentong ayongzükba agiogo.

Taküm Indiana, Louisiana, Oklahoma, Pennsylvania, South Carolina aser West Virginia nunga kar nung iba marathon agiogo aser kar nung agitsü.

Tennessee nungbo 2025 kum nung ang Bible reading marathon ya ayongzükba agitsü.

ANOGO ABEN TSÜNGREM DEN

Tesendaktep Ngutet

"Koba lenmang nung na aotsüla iba lenmangji atema ni ne dang ashitsü aser sayutsü" (T. Ken 32:8).

Tsüngremi mulungba indang angatetsü atema asenoki Tsüngrem dang nungi shisatsü meshia lai o bushidangtsüla aser yamaji Tsüngrem leniba teyari dena Lai o tejangja metettsü aser ibaji asen taküm leniba milen tesangwa lir.

Asen taküm mapa aser yimya ajunga nung asüngteta alitsüji tongtibang lir kechiyong ibaji ajanga asen taküm rangben renloka aor, ajisüaka Lai tesayuba ama melira, ibaji Tsüngremi mulungbabo masü aser yamaji tetsükdaksür bener arutsür. Tanelai jembibaji timba Tsüngremi mulungba asür, ajisüaka aikati pei tekolok nungi adokba olajia tanelai jembir ta bilema angatettsüsa mapangia bener arutsür. Item khuret ajak nungi jenbua lidaktsütsü atema asen teyanglur Tsüngremi Pa o Lai nung zülua dokja lir, anungji Tsüngrem o nem lenidaktsübajisa ajak dang tajungtiba lir. Mapang ajak nung asenoki Lai o nung ajemdaker taküm lia aotsüla aser ibaji meimchir asoshi milen tesangwa lir. 1 Tesa. 4:3; 5:18; 1 Peter 2:15 nung shia aliba amaji, asenoki asen tamang tashi itta kümdaktsüdi aser Tsüngremi kechi mulunger ibaji dang inyakdi.

Sudan nung ayawara ajanga Khristantema jenti asütsüa akok

April 21, 2024: Gaza aser Ukraine na nung rara aliba ajanga alima linüktemi Sudan nung rara kanga sendokogo, ajisüaka Sudan nung civil war tenzük kum ka ajungba mapang nung iba linük nung ayawara tenzükogo.

Sudan nung rara ajanga nisung 16,000 shi tepsetogo aser tanur million 4 densema nisung million 8.2 shi tesem balala nung jenshia lir.

Yaküm nungi tenzuka Sudan nung army aser paramilitary sepaitem tsüngda raraba ajanga Khristantem tamajungba takoksa angur.

Sudan nung melungtet telok Justice Africa Sudan-i, tesüiba kum ka tsüngda Khristan lenir asem tepsetogo aser Tenla ki 153 raksatsüogo, ta metetdaksü.

South Sudan nung aliba Nile Theological College nung Dean, Dr. Aida Weran-i, "Army temi metetsümonga Wad Madani nung Evangelical Presbyterian Church poksatsü, kechiyong yangji Rapid Support Forces (RSF) camp maliasü," ta metetdaksü.

United Nations (UN)-i, alima nung ayawara tamajungtiba tensaji Sudan nung

ataloktsü; nütsüng million 49 aliba Sudan nung nütsüng shilem 33 bo chiyungtsü agi kanga anünger aser hopta ishika tsüngda tanur 222,000 bo aya agi süadoktsü, ta metetdaksüogo.

Sudan nung nütsüng shilem 5.4 bo Khristantem lir. Iba linük nung Khristantem kanga reshikangshia aliba mapang nung ano ayawara tensa ajanga Khristantem aika süadoktsüa akok.

Kum 5 tejaklen (2019) tashi alia amshia yimsüsür Omar al-Bashir atsüngdok aser sorkar tasenbai ozüng tesashi kar agienba ajanga Khristantemi teimla ngua liasü, ajisüaka 2021 kum army general den Rapid Support Forces (RSF) longjemer Ato kilonser atsüngdok.

Sudan nung Catholics, Anglican, Coptic Orthodox aser Protestant denominations balala nungi Khristantemji linük nütsüng shilem 5 shi lir. Alima nung Khristantem tamajungtiba reshikangshiba linüktem rongnung Sudan ya jenjang 8buba nung lir.

Caritas International-i, "Linük nung kum aika raraba ajanga timtem jenti aremzükba

aruba sülen tang maneni Sudan nungertemi pei taküm atema amokmeren tulutiba ajangshir," ta metetdaksü.

Parnokisa, tang Sudan nung nütsüng million 18 dak temai ayawara ajangshidar; iba nungjagi nisung million 5 bo chiyungtsü agi kanga anünger, ta metetdaksü.

Yaküm April ita nung Sudan nung army aser paramilitary sepaitem tsüngda rara adok. General Abdel Fattah al-Burhan leniba nung Sudan Army aser Lt Gen Mohamed Hamdan-i aniba Rapid Support Forces na tsüngda hopta aika mangatettep adoka aruba sülen parnok tsüngda rara tenzuka liasü.

Sepaitemi sorkar atsüngdokba sülen ita 18 shi lir parnok civilian-i aniba sorkar nem tashi agütsütsü ta metetdakja liasü, ajisüaka General al-Burhan aser General Hamdan na tsüngda mangatettep adoka rara tenzuka liasü.

Iba ama tensa ka nung Caritas International-i, "Alima tesem balala nung raraba dak ranglokyonga Sudan nung aliba nüburttem mesendoktsü atema onoki alima linüktem dang mepishir," ta metetdaksü.

**AO OSHI ANGAZÜKDAK:
TANÜ ANGAZÜKTSÜBA OJANG**



Süngdong

(n) arem nung meyiba süng tedongtem (tree)
* Arem nung süngdong tulu alidak ozütem arur.

Süngdonglidong

(n) süngdong tapu ajak (types of trees and plants)
* Süngdonglidong alidak arem shiruru amonger.

OLONG PAITEP # 6764

1		2		3		4	5		
				6					7
		8							
9				10		11			
			12					13	
						14			
16						17			

TIPLÉN

- 1. Nisung jenti
- 4. Tsük rudenba
- 6. Temzüng tesashi
- 8. S___i
- 9. Nisung rongnung telemasa
- 10. Anogoshi
- 12. Ajanga aor
- 13. Tsük rizüngdak
- 14. Tebang nungi adokba
- 16. Süngdong tatembangtiba
- 17. Meputep

LANGTSÜNGLEN

- 1. Tenük telong
- 2. Committee dang ajar
- 3. Yagi ki okdoker
- 5. Yim lenmang
- 7. Temoatsü keter meyipa aruba
- 11. Kanga junga menemba
- 12. Kenyongi majinü
- 13. Rong kanga tulu

OLONG PAITEP # 6763 TELANGZÜBA

TIPLÉN :

- 1. Tanga, 6. Wara, 7. Rajang,
- 9. Anük, 10. Jenjang, 11. Alar,
- 14. Ngashi, 15. Nala, 16. Mechi.

LANGTSÜNGLEN :

- 2. Anga, 3. Yabang, 4. Tarok,
- 5. Orak, 8. Ainer, 9. Anema,
- 10. Jabili, 11. Among,
- 12. Miim, 13. Anem.

NAI-A YA METETTER MA

"WOMEN'S-ONLY WORLD RECORD"



Kenya tsür Olympic champion Peres Jepchirchir-i April 21, 2024 nü 44th London Marathon nung takok ngua "women's-only world record" ajatetogo. Arishi küm 30 tain Jepchirchir-i ghonda 2, minute 16 ser second 16 nung Buckingham Palace tejakdang finish line atong. Iba ajanga lai Mary Keitany ajanga 2017 London Marathon nung yanglutetba otsü 2:17:01 ajateta liasü.

Taküm tetoktepba nung Ethiopia tsür arishi küm 41 tain Bekele-i tanabuba jenjang (2:04.15), aser Britain tsür Emile Cairess-i tasembuba jenjang (2:06.46) takoktem nguogo.

Manipur nung Imagi Meira convenor amakba atema lungkak ait



Imphal, April 21, 2024

(Agencies): Honibar aonung Ima gi Meira nung convenor ki amakba aija Deobarnü tetsürtemi Imo Filling Petrol Depot nung mener lungkak ait. Yasüng 9:30 ako meta nisung kar prangpong amer arua Imagi Meira nung convenor, Th. Sujata'er ki amak Election anogo nung mejangjaba nisung kari injang khatoka senzüba aser amokmerenba atema Imagi

Meira-i aitsüba sülen yasüng lar ki amak ta Sujata-i ashi. Sorkari item nisungtem aputsüla ta lai ashi. Yasüng 9:15 ako meta mejangjaba nisungtemi prangpongtem amer lar kidangi aru aser injang khaloktsü. Iba tatalokba sülen Kakwa police arua osang metetpela aser bushisüngdang asü ta Sujata-isa metetdaksü. Manipur tensa mejungi aliba atema tebilemtsü abener aser iba ajanga tesüiba ita 11 tashi

Imphal-i senzusenbongba nung timtemer, ta laisa ashi. Election mapang tim masüba aser ozüng alema inyakba ajanga Meitei nunger tsüngda telongjem nung mepetmesü adokogo ta Sujata-isa ashi. Civil society organisations aser public teyari agia iba mapa inyakertem maitsü jangjatsüla ta laisa shisem. Iba tatalokba anema iba tesem nung alirtemi Deobarnü mener lungkak aita liasü.

Onoki Congress den masü AIUDF den tokteper: Himanta Sarma

Guwahati, April 21, 2024

(Agencies): Assam nung onoki Congress party masü saka All India United Democratic Front (AIUDF) den tokteper ta Chief Minister Himanta Biswa Sarma-i ashi. BJP Diphu candidate Amar Singh Tisso ateama rally ka nung jembidang "Lok Sabha election mezüngbuba shilem nung BJP-i takok tulu angutsü" ta CM Sarma-i ashi.

"Tang Assam nung Congress mali. Onoki All India United Democratic Front (AIUDF) den tokteper. Nagaon aser Karimganj nung Congress mali" ta pai ashi. Menden pungu nung BJP-i takok nguogo. Assam nung menden 11 nung contest mesüra election kecha mali. BJP-i menden ajak nung takok angur, ta Sarma-i ashi. Lok Sabha election tanabuba

shilem asoshi BJP jenjang junga dang lir. Nagaon nung BJP jenjang junga lir aser April 23 nü election rally ka nung adentsü, ta Chief Minister Sarma-isa ashi. "Dhubri atema ni kecha ashitsü makok kechiyong iba tesemi mao. Election agiba sülen ni shitetsü saka BJP junga inyakdar. Nisung ajaki Modi meimer" ta paisa ashi.

Mizoram Salvation Army lanurtemi Corps Cadet Sunday among



Aizawl, April 21, 2024

(Agencies): Alima den külemi Mizoram Salvation Army lanurtemi Corps Cadet Sunday mongogo. February 29, 1896 nü Junior Cadet tenzük aser iba ya Salvation Army nung lanurtem aser tanurtem dang theology sayutsü atema liasü aser applications 500 agütsü. 1898 tashi nung Junior Cadet ministry nung züngsem 3,000 aküm. February 10, 1898 nü South Sussex nung British Commissioner-i Junior Cadet

nungi Corps Cadet ta melen aser küm 124 tashi Corps Cadets ajanga alima tesem balala nung tenzüka arur. 1929 küm Territorial Commander, Colonel McKenzie lenisüba kübok Corps Cadet amenok. Idangji Aizawl nung Major Kawlkhuma, Biate aser Ratu den nisung 10-i tenüng agüja liasü. January 1930 nungi Khualkungi, Thanzami, Mungi, Lianchhungi, Di-a, Lalchuanga, Tawia, Senbawnga, Doliana aser

Lalnglaki nunger Mizoram nungi mezüngpur Corps Cadets aküm. Tang Mizoram nung Corps Cadets 3699 lir. Corps cadet applicants ya arishi küm 11 asütsüla aser moko o drugs nungi pilaa alirtem asütsüla. Parnok indang Laishiba tekongji Tenüngsang Ken 119:9 lir. Corps Cadet Sunday nung tezüngzüktep agir, ken atener, Lai azünger, sensakertem yarir, mozü ki, rehab homes & institutions semdangert ta Corps Cadet Guardian Jenny Zothanpuui-i ashi.

Gaza nung Palestine nunger tepsetba nisung 34,097 jungogo



Gaza City, Rongchii/April 21 (Agencies): Gaza Strip nung October 7 nü nungi tenzüka tang tashi Israel-i amakba nung Palestine nunger 34,097 tepsetogo, ta health ministry ajanga ashir.

Tesüiba ghonda 24 tsüngta Palestine nunger 48 tepsetogo aser 79 yiru ta parnoki ashir.

Ajisüaka nisung asüba ya kanga agi timba alitsü, kechiaser Israel-i tayimtsü amshia amakdang ki o jen raksatsüba agi nisung tasü mang meyerijang aika anenbanga alitsü südi ta amanger.

"Israel occupation temi Gaza Strip nung tesüiba ghonda 24 tsüngta kibong pongu samatsü aser iba amapang nisung 48 asü aser 79 yiru," ta ministry sangdong ka nugashi.

"Nisung aika ki o ten teraksa agi nembanga lir aser lenmang nung lir, kechiaser rescuer temi parnok metongteter."

Gaza south tsütsü Rafah

yimti nung Honibar aonung Israel sepaitemi tayimtsü amshia anaben amakdang kibong ka nungi tanur 13 aser tetsür ana tepset, ta Gaza hospital record ajanga ashir.

Alilen nungia Rafah amaktsü sentong ka yangluba mechi linük balalai Israel Ato Kilonser Benjamin Netanyahu anema nodak, kong anünga aliba Hamas indang brigades tem aser Israel nunger October 7 nü pua bener aortem yua lir südi ta Israel mitkari amanger.

Occupied West Bank kübok Ramallah aser Hebron nunga Israel sepaitemi Honibar aonung nisung ti apu, ta Wafa news agency ajanga ashi.

Gaza nung rara tenzüker ita tenet buba nung lir aser West Bank tesem ajungalen azüdokshi ya kanga tali kumogo. Israel sepaitemi anogoshi amai ki o jen meita aor aser nisung telok-telok apur, aser yangji aliba Israel nungeri Palestine nunger dak lendong timtem balala agütsür.

April 17 tashinung occupied West Bank nungi Palestine nunger 8,000 dak tema Israel-i pua liasü, ta rights group Addameer Prisoner Support and Human Rights Association ajanga asadangteta lir.

Israel-i pei litsü-lika alema oa tashiyim amshiba mapang tetsübotsüka khateper. Gaza nung rara tenzüka sülen West Bank nung Israel sepaitemi aser settlers temi Palestine nunger 485 tepsetogo aser 4,900 yirutsüogo, ta Palestinian Health Ministry ajanga ashir.

Mulungnen O



ASÜR T. MEYI IMSONG (ASANGMA)
7TH JULY 1953 - 10TH APRIL 2024

Meyimlaba mapang ka nung Obala iba akümüli wadang tembangdang aser mapang tatsüka shirangdang, nenok kija aser lokti shirnokisa sarasadem, rongsen, aser aria bilemba temeim nüktzü agi onok den yaritepogo ajak dang kanga pelar.

Nenok ajak tenüng teta meshitetba atema kanga sasa bilemer, saka Teyanglur Tsüngremi nenok mapa tajung moajang ta ozü tamang sarasadem.

Talisa item dang ya pelaba shisemer :

1. Asangma Baptist Arogo
2. Asangma Riongsanger Putu Menden
3. Alempang Baptist Arogo
4. Alempang Ward Yimden
5. Asangma Senso Telongjem, Mokokchung
6. Asangma Fellowship, Mokokchung
7. Ao Baptist Arogo, Shillong
8. Tongpok Semchir Imsongunger Kidong
9. Shri. Tongpang Ozüküm, Advisor, GoN
10. Shri. A. Pangjung Jamir, Advisor, GoN
11. Shri. Temjenmenba, Advisor, GoN
12. Mokokchung District Badminton Association

Temeim Chirnur, Semchirtem aser Kinungertem.

Imran Khan kinungtsü nem miim agütsüba mangur: Doctors

Islamabad, Rongchii/April 21 (Agencies): Doctor temi Pakistan indang taoba first lady Bushra Bibi temang kanga junga tendangba sülen Pakistan Tehreek-e-Insaf (PTI) tentetsang aser la kinungbo'er kibongi kanga temulung alemba doctor tem lia la temang nung miim mali ta shiogo.

Bushra Bibi nem toilet cleaner meyoktetba chiyongtsü

agütsü ta tang Adiala Jail nung puoka alisang Imran Khan-i tai tonglokja liasü.

Taoba mapang ato kilonser inyaksang aser tang tepuokdak yua alisang Imran Khan kinungtsü Bushra Bibi ya Islamabad nung aliba private hospital ka nung endoscopy densema temang tendanga yangji ghonda trok liasü ta ashir.

Bushra Bibi-i azü tendangtsü

memulung aser azü tuzüka magütsü saka Imran Khan indang doctor Asim Yousuf lia ultrasound, ECHO aser ECG tests agia liasü, ta osang ajanga ashir.

Medical reports nung Bushra Bibi dak gastric timtem tilaka aliba putet aser doctor temi la temang junga lir ta sangdong.

(Maneni tapak 8 nung...)

Ukraine nem teyari agütsütsü atema US House nung agizükogo

Washington, Rongchii/April 21 (Agencies): Russia den raraba mapang Ukraine nem USD Billion aika alang military teyari agütsütsü atema House of Representatives nung agizükogo.

Iba teyari agütsütsü atema Congress nung anemertem aika adoka mapang talangka bangdaka ayuba sülen bipartisan deal ka yanglua USD billion 61 alang teyari agütsütsü atema agizükogo.

Republican temi ashiba agi, teyari shilem asemsübo prangbong injang aser hadir balala atema asütsü.

Ukraine Tir Volodymyr Zelensky-i US-i tyari agütsüba ya kanga dang nüngdaka liasü ta ashi.

Iba teyari agütsüba ajanga rara atsülanga modaktsütsü aser nisung taküm meyerijang aika kümzüksü, ta paisa ashi.

Ajisüaka iba teyari ya kodang Ukraine tonga aotsü aji mejangja. Ken o ya Senate dangi abentsü aser anogo ishika tsüngda agizüktsü imlar. Iba sülen Tir Joe Biden-i sign süa ozüng akümtsü.

Prangbong injang agütsüba

den Ukraine nem ano "forgivable loans" ama rongsenketzung nung teyari USD billion 9 agütsütsü, koba meyipa magütsütsü.

Russia Tir Vladimir Putin-i 2022 küm February ita nungi Ukraine amak tenzü. Iba sülen linük anaprongla nungi nisung meyerijang aika aser talisa sepaitem aika süogo mesüra yiruogo aser Ukraine nunger aika pei talidak ki toktür jenshiaogo.

Ukraine ya Russia den raratsü atema anüolen aliba linüktemi teyari agütsüba dak metaloker lir aser Russia nunger sepaitem nokdangtsü atema timtema aliba mapang iba teyari kanga nüngdaka liasü, kechiyong hopta ishika tsüngda Russia nunger sepaitem tanem tanemi tejakdangi odar.

Km 1,200 dak tema front line nung Ukraine nunger speiatem injang aser artillery shell agi anünga aliba mapang tang iba teyari ajanga kanga ajangzüktsü.

Russia-i asendenshir tesem balala amakba mapang taoba hopta tatemi Ukraine military-i

linük anütoklen tensa tamajungba küma aoba tekümdangtsü metetdaksür liasü.

Prangbong injang agi anünga akümba ajanga Ukraine teyari asoshi matatei liasü aser kasa mapang nung Russia-i tanem tanemi litsütem atsünga liasü.

House nung vote agitepba mapang teyari agütsütsü pusema nisung 311-i vote asü aser nisung 112-i iba anema vote süa liasü.

Iba telemtetba pelashishia agizüka Biden-i bipartisan inyakyim asoshi tenüngsang agütsü aser Senate dang iba bill takaratiba nung agizüktsü mepeshi, ajita asünungdang Ukraine nem takaratiba nung parnoki nüngdaka aliba teyari agütsütettsü, ta ashi.

Honibarnü agizükba foreign aid package nung ano Israel nem military teyari USD billion 26.4 aser Gaza atema humanitarian teyari USD billion 9.1 aser Taiwan densema Asia-Pacific nung parnok den sendaktepa aliba linüktem nem USD billion 8.1 agütsütsüba densema lir.

Nato Secretary-General Jens Stoltenberg-i ashiba agi,

iba teyari agütsüba ajanga ano Ukraine nem Europe nung parnok den sendaka aliba linüktemi billion aika alang teyari agüja aliba tali jenjang tajungba kümdaktsütsü

"Russia anema raratsü asoshi takokba tashi teyari angutsü Ukraine langa lir," EU chiefs Ursula von der Leyen aser Charles Michel nati külem sangdong ka ajanga metetdaksü.

Kremlin otongdar Dmitry Peskov-i ashiba agi, iba teyari agütsüba ajanga United States of America takarba kümdaktsütsü, Ukraine tali raksatsü aser Ukraine nungertem taliba asütsü.

BBC World Service's Newshour programme den sensaksemba mapang Ukraine indang foreign affairs committee tekolakba Oleksandr Merezhko-i iba ya otsüsütsüa telemtetba tongtibang ka agiba lir, aser iba ajanga civilian aser sepaitem aika taküm samatsü aliba kümzüksü, ta ashi.

"Iba ajanga onok nem tashi agütsür aser tasü ita kümdaktsüba den maneni

raratsü atema tali temulungtetba kümdaktsür aser raraba tesem nung onok pusema tensa melenshitsu amanger," ta pai ashi.

Zelensky aser CIA tekolakba William Burns napronglai, America-i teyari magütsüra Ukraine-i iba rara makoktsü ta shir liasü.

Iba teyari agütsüba ajanga Ukraine-i rara akoktsü ta masü, saka maneni linük kümzüka ayutsü atema raratsü asoshi maongka agütsütsü.

House nung iba bill agizüktsü atema Republicans temi sota liasü aser parnok rongnung karibo US-Mexico arrtsü achaayangtsü atema amshitsu melena bendangleni sen yokba ashishia liasü.

Republican House Speaker Mike Johnson-i ashiba agi, pa jenjang mejungi kümaka pai iba inyakyim ya tejakdangi bener oner.

Honibarnü vote agitepba mapang Democrats 210 pronglai teyari pusema vote agütsü. Republicans tem timbai iba anema vote agütsü aser parnok rongnungi 101-i bill pusema vote agüja liasü.

Panwar-i rowing nung India atema mezüngbuba Olympic quota nguogo



Rongchii/April 21, 2024 (Agencies): Chungju, South Korea nung Honibarnü 2024 World Asian and Oceanian Olympic aser Paralympic Qualification Regatta nung tebur kija scull event nung tasembuba jenjang nung tembanga, Balraj Panwar-i rowing nung India atema mezüngbuba Paris Olympics quota ngutetogo.

Arishi küm 25 tain Indian Army rower, shibai taoba küm Hangzhou, China nung mezüngbuba Asian Games asayaba mapang tera agi dang bronze medal magu, pai 2000m race nung alizüing 7:01.27 minutes nung tongteta

tasembuba nung tembang aser quota nguteta liasü.

Tebur kija asaya scull event nung temaba jenjang nung tembanga asayar pongu Olympics atema qualify asür.

Tebur lightweight double sculls, kong Tokyo nung Olympics asayaba mapang India team-a asaya liasü, iba asaya nung takümbo qualify mesüetet.

Iba asaya nung temaba jenjang nung tembanga team ana nem dang quota agütsür aser India nung tarep Ujjwal Kumar aser Arvind Singh na tasembuba nung tembanga liasü.

Iba tetezü July 26 nü nungi tenzüka asayatsü aliba Olympics nung rowing asaya nung India nung asayar kati dang shilem agitsü.

Tokyo Olympics nung Arjun Lal aser Arvind Singh na tebur lightweight double scull nung India tenüing nungi asaya aser tena 11buba nung tembanga liasü.

Asian Qualifiers ya Asian Rowing Cup den külemi dang asayar, kong India nung tarep Salman Khan aser Nitin Deol

nati tebur double scull event nung gold medal ngua liasü.

Iba tako anguba sülen anogo ka lir Haryana kübok Karnal nungi asayar Panwar-i kanga junga asaya liasü.

Mezüngbuba 500m leg nung Panwar ya Kazakhstan nung gold medallist Vladislav Yakovlev aser Hong Kong nung asayar Hin Chun Chiu sülen tasembuba jenjang nung liasü.

Ajisüaka Panwar-i pa tashi amshia pa tejakdang aküm aser halfway mark (1000m) 3:25.51 nung ajanga liasü.

Iba sülen pa maneni tejakdang liasü aser tatembangbuba 1500m ya pai 5:12.67 nung ajang aser Hong Kong nung asayar dang nungi second asem agi pa tejakdang liasü.

Ajisüak tatembangbuba lap nung Yakovlev-i kanga junga asaya aser alizüing 6:59.46 seconds nung tonga liasü.

Maneni Indonesia nung asayar Memo Memo-ia Panwar ajatet aser minute 7 majung tsüingda alizüing tongteta pai silver medal angu.

Garbine Muguruza tennis asaya nungi anenogo



Rongchii/April 21, 2024 (Agencies): Taoba mapang Slam ana tashi koker aliba asayar Garbine Muguruza-i Honibarnü la asaya nungi anenba sangdongogo. La küm ka dak tema masayai lir tang asaya nungi anenogo.

"Asaya nungi anentsü atema mapang tongogo. Ni mapang talangka jangradema asayaogo aser tang asaya nungi anentsü mapang tongogo," ta Laureus Awards mapang osangbenertem den sensaksema mapang arishi küm 30 tain Muguruza-i ashi.

"Ni jenjang tilala agia iba telemtetba agiogo," ta laisa ashi. 2023 küm January ita Lyon Open nung asayaba sülen Muguruza tang tashi nung official asaya ka nung danga asaya mali.

"Ni tetoktepa nungi anenba sülen ni kidangi ao aser anisüingzüka liasü," ta Muguruza-i ashi shibai kija asaya title 10 abenba sülen asaya nungi anenogo.

"Anogo ka nungi anogo ka ta süia aoba mapa ni

jangratatema aküm aser asaya aliba mapang timtemba menungra mebilem," ta lai ashi. Muguruza ya 2012 küm mezüngbuba WTA main-draw nung asaya aser 2015 küm Wimbledon nung mezüngbuba Grand Slam ka final tongteta liasü, kong la Serena Williams-i tsükdaktsü.

Ajisüaka 2016 küm lai America tsürta ya koka French Open akok aser 2017 küm Wimbledon final nung Venus Williams koka liasü.

French Open akokba sülen Muguruza ya Spain tsürtem rongnung Arantxa Sanchez Vicario sülen iba Grand Slam akokba mezüngbuba asayar aküm. Vicario-i French Open ya 1998 küm koka liasü.

Taruba küm Wimbledon akokba sülen la ya All England Club nung takok anguba Spain tsürtem rongnung tanabula aküm. Spain tsürtem rongnungi Conchita Martinez-i 1994 küm Wimbledon koker liasü.

Wimbledon akokba mapang Martinez ya Muguruza indang coach liasü aser iba sülen ita ana lir la number one asayar aküm.

Hockey India-i national camp atema asayar 28 shimogo

Rongchii/April 21, 2024 (Agencies): Paris Olympics masaya tsüingda Hockey India-i Deobarnü tebur national coaching camp atema züingsem 28 agi kümetta core probable group ka sangdongogo.

Camp ya Deobarnü tenzükogo aser May 31 nü tashi SAI Centre, Bengaluru nung agitsü. Australia nung Test series ka nung asaya pongu asayaba 0-5 agi makokba sülen team ya camp-i meyipa aruogo.

Iba camp tembanga sülen team ya FIH Pro League ana atema Belgium aser London-i aotsü, kong parnok Argentina, Belgium, Germany aser Great Britain den asayatsü.

"Iba camp nung kanga dang

tongtibang training tenzüksü atema onok yongya atar aser Paris 2024 Olympics masaya tsüingda onok takokba tashi renemer alitsü nüingdaker. Team nung asayar tejen aser tasentem meyoktepa lir," ta chief coach Craig Fulton-i ashiba HI sangdong ka ajanga metetdaktüsü.

"Australia nung oa asayaba ajanga onok kechi nung temetongshitsü ali aji jangjaogo aser Olympics aser Pro League tatembangbuba leg masaya tsüingda onok tashimait metonshitettsü ta ni amanger," ta paisa ashi.

National coaching camp core group nung goalkeepers Krishan Bahadur Pathak, PR Sreejesh, Suraj Karkera aser

defender Harmanpreet Singh, Jarmanpreet Singh, Amit Rohidas, Jugraj Singh, Sanjay, Sumit, aser Amir Ali nung erdensema lir.

Midfielder tem rongnung Manpreet Singh, Hardik Singh, Vivek Sagar Prasad, Rabichandra Singh Moirangthem, Shamsheer Singh, Nilakanta Sharma, Rajkumar Pal aser Vishnukant Singh nung lir.

Maneni forward tem rongnung Akashdeep Singh, Mandeep Singh, Lalit Kumar Upadhyay, Abhishek, Dilpreet Singh, Sukhjeet Singh, Gurjant Singh, Mohammed Raheel Mouseen, Bobby Singh Dhami, aser Araijeet Singh Hundal nung erdensema lir.

WFI-i World Qualifiers atema trails agishitsü

Rongchii/April 21, 2024 (Agencies): Asian Olympic Qualifiers nung India tebur team-i junga masayatetba sülen Wrestling Federation of India (WFI)-i, World Qualifiers atema India team shimtsü asoshi trials agishitsü Deobarnü telemtetba agiogo. World Qualifiers ya Paris Olympic Games atema quota angutsü atema tatembangbuba maongka asütsü.

Quota angutsü 18 aliba nungi India nung asayartemi pezü dang ngua lir aser ajia Vinesh Phogat densema tetsürtemi dang anguba lir. Olympics atema quota angurtem rongnung Antim Panghal (53kg) Anshu Malik

(57kg) aser Reetika (76kg) nung erdensema lir.

Ano category 14 anunga lir aser Asian Qualifiers den medemdangra Turkey nung May 9 nü nungi tenzüka asayatsü aliba World Qualifiers nung takok angutsü tasakba asütsü.

WFI-i category 14 atema trails ayongzüka asayatsü, kong tetsür atema ana aser tebur freestyle aser Greco Roman styles atema trokrok densema lir. Iba trail ya April tatemlen mesüra May ita mezüngbuba hopta ayongzüka asayatsü.

"Tir Sanjay Singh-i asayartem performance dak sendakba nung India coach

aser selection committee züingsemtem den sensaksemogo aser parnokia asayartem kanga mejungi shilem agiogo koba agizüktsü makok ta shiogo. Free style nung dena quota mongutetba ya taoba mapangbo kodanga ataloka mali," ta source kati ashi.

"WFI-i quota monguteti aliba quota 14 prongla atema trails agitsü telemtetba agiogo," ta source-isa shisem.

"Turkey Qualifiers sülen iba dak sendakba nung telemtetba ka agitsü akok," ta pai shisem.

Iba asayamung nung Greco Roman wrestler temia mezüngbuba round majangteti liasü.

BENDANGLI OSANG : Tapak 7 nungi...

Imran Khan kinungtsü nem miim...

Dr Asim, jail superintendent aser Pakistan Institute of Medical Sciences (PIMS) nem agütsütsü aliba report nung Bushra Bibi-i azü tuzüka agütsütsü memulung ta ashitsü.

Honibarnü Pakistan nung aliba accountability court ajanga Bushra Bibi ya anogo ana tsüingta temang ajunga reprangtsü totuyuba agüja liasü.

La nem miim/miim aliba chiyongtsü agütsü asü masü ta bushisüingdangtsü atema Shaukat Khanum Hospital mesüra lai mulungba private hospital ka nung la temang reprangtsüla, ta ita tetenzüklen Bushra Bibi-i Islamabad High

Court dangi ken o aben. Shaukat Khanum Hospital ya Khan'er charitable organisation kati lapokba lir.

Lai agütsüba petition nung la temulungjang aronger aser la terok aser tepang nung timtem lir aser item timtem ya la nem agütsüba chiyongtsü nung miim inoktsüba nung adok südi ta amanger, ta shia liasü.

Bushra Bibi ya tang Bani Gala tepuokdak yua lir - koba Islamabad nung arishi küm 71 tain Khan'er ki - aser February ita 'un-Islamic nikha' ken o mechi la tepuokdak ayutsü obendang agütsüba sülen iba ki ya sub-jail kumdaktsü.

BILEMDANGANG

"Nü tebilemdangba melenshitetra nü taküm melenshitettsü."